

BASES REGULADORAS PARA A CONCESIÓN DE SUBVENCIONS A CLUBS DEPORTIVOS DA PROVINCIA DE PONTEVEDRA QUE PARTICIPAN EN COMPETICIONS DE ÁMBITO INFERIOR A ESTATAL PARA O ANO 2022

O modelo deportivo español evolucionou grazas aos continuos e vertixinosos cambios que experimentou este fenómeno social; cada día máis cidadás e cidadáns practican deporte, o cal alcanzou unha proxección na sociedade que dificilmente se prevía hai poucas décadas.

O deporte é unha actividade esencial, enormemente enriquecedora e xeradora de benestar persoal. Ademais, constitúe un importante instrumento de cohesión social, de transmisión de valores e de pulo económico.

Por iso, cómpre facilitar o acceso á práctica deportiva e fomentar a participación en actividades organizadas polas federacións deportivas.

A participación en competicións oficiais de ámbito inferior a estatal por parte dos clubs da provincia de Pontevedra considérase unha actividade de interese para a Deputación de Pontevedra, xa que constitúe un factor esencial no desenvolvemento deportivo, supón un estímulo para fomentar o deporte base e cumpre unha función representativa e de reputación xeral do deporte na provincia.

No artigo 43.3 da Constitución española establécese que os poderes públicos deberán fomentar a educación física e o deporte como un dos principios reitores da política económica e social.

Na Lei 10/1990, de 15 de outubro, do Deporte, contéplase a importancia das accións organizativas e de promoción desenvolvidas polas asociacións deportivas.

Entre as competencias atribuídas pola lexislación do deporte de Galicia, pola de réxime local e pola lexislación sectorial do Estado ás deputacións, atópanse o fomento, a promoción e a difusión do deporte, así como calquera outra actuación que beneficie o desenvolvemento deportivo local, comarcal ou provincial.

Para lograr estes obxectivos, a Deputación de Pontevedra convoca as subvencións para os clubs deportivos da provincia de Pontevedra que participan en competicións oficiais federadas de ámbito inferior a estatal.



Primeira. Obxecto

O obxecto desta convocatoria é fixar as bases reguladoras das subvencións das axudas destinadas a clubs deportivos da provincia de Pontevedra que participan en competicións e actividades de ámbito inferior a estatal e os clubs que participan na competición de fútbol Preferente Galicia grupo 2.^a.

Segunda. Financiamento

A concesión das subvencións estará suxeita á dispoñibilidade orzamentaria e convocarase con cargo á aplicación 22/340.3410.489.23 do Orzamento da Deputación para o ano 2022 por un importe total de seiscentos cincuenta mil (625.000,00) euros; o importe para cada liña será de:

- Competicións de ámbito inferior a estatal.....575.000,00 €
- Competición de fútbol Preferente Galicia grupo 2.^a.....50.000,00 €

Terceira. Entidades beneficiarias

Poderán beneficiarse desta convocatoria as entidades deportivas sen ánimo de lucro, legalmente constituídas e con domicilio fiscal na provincia de Pontevedra.

Non poderán beneficiarse as entidades nas que conorra algunha das circunstancias previstas nos artigos 10.2 e 10.3 da Lei 9/2007, de 13 de xuño, de subvencións de Galicia (LSG). A acreditación de non estar incursas nas devanditas prohibicións realizarase mediante a declaración responsable das entidades solicitantes; no caso das agrupacións, deberá presentarse a declaración por cada unha das persoas ou das entidades agrupadas.

Todas as entidades solicitantes deberán estar ao corrente das obrigas tributarias coa Axencia Estatal Tributaria, coa Facenda galega, coa Seguridade Social e coa Deputación, e non ter obrigas ou incumprimentos pendentes, de calquera tipo e non só económicos, coa Deputación.

Non poderán beneficiarse destas subvencións as entidades que teñan pendentes de xustificar axudas concedidas no exercicio anterior no mesmo programa.

As entidades solicitantes desta convocatoria non poderán presentar solicitudes na convocatoria de ámbito estatal.



Cuarta. Actividade e gasto subvencionable

Para os efectos destas bases, subvencionaranse os gastos de participación dos equipos e deportistas en competicións e actividades deportivas.

Consideraranse gastos subvencionables aqueles que de maneira indubidable respondan á natureza da actividade subvencionada, resulten estritamente necesarios e se realicen no prazo establecido e sempre que non sexan repercutidos no deportista; son os seguintes:

- **Gastos federativos:** os que correspondan a gastos emitidos polas federacións deportivas para a participación dos equipos ou deportistas das entidades deportivas nas competicións oficiais.
- **Gastos de competición:** os que se correspondan con gastos de desprazamentos, de aloxamento ou de manutención dos equipos ou deportistas das entidades deportivas nas competicións oficiais.
 - Os gastos de desprazamento poderán ser de avión, tren, autobús ou vehículo de aluguer. No concepto da factura deberá especificarse a competición oficial á que asiste o equipo; cando se expida unha factura única de varias viaxes, deberase detallar cales.
- **Gastos de persoal:** os que correspondan a soldos, salarios ou retribucións unicamente do persoal do club acreditados mediante ficha federativa. Para o que, coa xustificación, o club deberá presentar un documento federativo que certifique a relación de xogadoras, xogadores, adestradoras e adestradores con licenza federativa.
 - No caso de actividades non profesionais servirá un xustificante ou xustificante de recepción, no que se acrediten a identificación da persoa beneficiaria, a actividade que desenvolve, a data e o importe e que se realizou, no caso de ser procedente, a correspondente retención fiscal.
- **Material deportivo:** os que correspondan a vestimenta ou equipamento deportivos.
 - Os gastos de vestimenta de equipamentos oficiais dos equipos do club para a competición, as de viaxe ou de adestramento, incluídas as mochilas.
 - Os gastos de equipamento deportivo de material deportivo non inventariable imprescindible para realizar a actividade deportiva.
- **Gastos sanitarios:** os relacionados coa saúde das e dos deportistas no desenvolvemento da actividade deportiva e da participación nas competicións oficiais.



Quinta. Procedemento de concesión

O procedemento de concesión das subvencións levarase a cabo en réxime de concorrencia competitiva.

En ningún caso a suma total das axudas concedidas poderá superar o orzamento máximo previsto nestas bases.

A concesión destas subvencións é compatible coas doutras administracións públicas que se reciban para o mesmo fin, tendo en conta que o conxunto de todas elas en ningún caso poderá superar o 100 % do orzamento que presente o club.

O importe das subvencións calcularase segundo os criterios de valoración recollidos nestas bases. Establécese un importe máximo de subvención para cada competición; en todo caso, as axudas non poderán superar o 40 % do orzamento presentado coa solicitude. Unha vez realizada a primeira repartición e no caso de que quedase diñeiro dispoñible, realizaranse tantas reparticións coma fose necesario, seguindo o mesmo procedemento.

Os límites establecidos serán os seguintes:

- Competición de ámbito inferior a estatal.....2.500,00 €
- Competición de fútbol Preferente Galicia Grupo 2.^a.....6.000,00 €

Sexta. Lugar de presentación de solicitudes

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido no artigo 14.2 da Lei 39/2015, de 1 de outubro, do procedemento administrativo común das administracións públicas (LPACAP).

No caso de presentar a solicitude de forma presencial, requirirase que a emende mediante a presentación electrónica. Para este efecto, considerarase como data de presentación da solicitude aquela na que se realizase a emenda.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de



identificación baseados en claves concertadas (sistemas de usuario e contrasinal) e certificados electrónicos (incluído o DNle).

Sétima. Prazo de presentación de solicitudes

O prazo de presentación de solicitudes será de vinte (20) días hábiles e empezará a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO).

Oitava. Comprobación de datos

Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas xurídicas solicitantes
- DNI ou NIE da persoa representante legal do club
- Domicilio fiscal da entidade solicitante
- Certificado de estar ao corrente das obrigas tributarias coa Axencia Estatal da Administración Tributaria (AEAT), coa Facenda Autonómica, coa Seguridade Social e coa Deputación de Pontevedra

Se as persoas interesadas se opuxesen ás devanditas consultas, deberán indicalo no cadro correspondente habilitado no formulario de inicio e achegar os documentos correspondentes.

Excepcionalmente, no caso de que algunha circunstancia imposibilitase a obtención dos citados datos poderáselles solicitar ás entidades a presentación dos documentos correspondentes.

Novena. Documentación

As entidades solicitantes presentarán a solicitude a través do formulario normalizado, no que incluírán o orzamento estimativo. Ademais, xunto coa solicitude deberán presentar a seguinte documentación:

- **Certificado federativo (anexo I).** Certificación oficial expedida pola federación correspondente, na que se detallen os criterios de valoración específicos e previstos nas bases.



- Aqueles clubs de modalidades deportivas que desenvolvan a súa actividade competitiva no ano natural poderán presentar xunto coa solicitude unha declaración xurada na que se detallan os criterios de valoración específicos e previstos nas bases. En todo caso, deberán achegar o certificado federativo coa xustificación; en caso de presentar un menor número de licenzas, reducirase o importe da subvención proporcionalmente.

A documentación complementaria deberá presentarse electronicamente. As persoas interesadas responsabilizaranse da veracidade dos documentos achegados. Excepcionalmente, a Administración poderá requirir a exhibición do documento orixinal para cotexalo coa copia electrónica presentada.

Se algunha das persoas interesadas entregase a documentación complementaria presencialmente, requiriráselle que a emende a través da súa presentación electrónica. Para este efecto, considerarase como data de presentación aquela na que se realizase a emenda.

Décima. Notificacións

As notificacións de resolucións e actos administrativos realizaranse só por medios electrónicos, nos termos previstos na normativa reguladora do procedemento administrativo común. As notificacións practícaranse a través da Carpeta Ciudadana e de Dirección Electrónica Habilitada única. Ambos os sistemas son accesibles desde <https://sede.depo.gal>.

As notificacións entenderanse practicadas no momento no que se acceda ao seu contido e rexeitadas cando transcorresen dez (10) días naturais desde a posta a disposición da notificación sen que se acceda a este.

O sistema remitiralles ás persoas interesadas avisos da posta a disposición das notificacións á conta de correo electrónico indicada na solicitude. Estes avisos non terán en ningún caso efectos de notificación practicada, e a súa falta non impedirá que a notificación sexa considerada plenamente válida.

Se o envío da notificación electrónica non fose posible por problemas técnicos, a Deputación de Pontevedra realizará a notificación polos medios previstos na normativa reguladora do procedemento administrativo común.



Décimo primeira. Trámites administrativos posteriores á presentación de solicitudes e emenda destas

Todos os trámites administrativos que as entidades interesadas deban realizar durante a tramitación deste procedemento deberán efectualos electronicamente a través do modelo "instancia xenérica", dispoñible na Sede electrónica da Deputación de Pontevedra (<https://sede.depo.gal>).

No caso de que a solicitude non reunise os datos esixidos ou calquera dos previstos no artigo 66 da LPACAP, requiriráselle á persoa interesada que no prazo de dez (10) días hábiles emende as faltas ou presente os documentos preceptivos, e indicaráselle que, se non o fai, terase por desistida a súa petición, que se arquivará sen máis trámites.

Décimo segunda. Criterios de valoración

Co obxecto de garantir unha valoración obxectiva para asignar os importes, estableceranse os criterios de orzamento achegado polas entidades deportivas e as diferentes licenzas federativas que presenta a entidade a través dos certificados federativos.

Criterios de valoración específicos	Ponderación
Orzamento de gastos subvencionables	40 %
Número de licenzas federativas	60 %
Total	100 %

Orzamento de gastos subvencionables:

O procedemento para determinar os importes do orzamento establecerase multiplicando o valor do punto do orzamento polo orzamento que presenta cada unha das entidades deportivas na solicitude, segundo os límites establecidos para cada liña, que serán:

- Máximo valorado en ámbito inferior a estatal.....10.000,00 €
- Máximo valorado en Preferente Galicia Grupo 2.^a.....20.000,00 €



Cálculo do valor do punto do orzamento:

O valor do punto de orzamento calcúlase dividindo o 40 % do importe destinado a cada liña de competición entre a suma total dos orzamentos presentados, tendo en conta os máximos establecidos, polo que a ningunha entidade se lle terá en conta un orzamento maior ao establecido nos límites.

Licenzas federativas:

O procedemento para determinar os importes con base nas licenzas establecerase multiplicando o valor do punto das licenzas pola puntuación total obtida por cada entidade deportiva.

Cálculo do valor do punto das licenzas:

O valor do punto das licenzas calcúlase dividindo o 60 % do importe destinado a cada liña de competición entre a suma total dos puntos obtidos polas licenzas de cada entidade deportiva.

Os apartados para determinar as puntuacións das licenzas definidos nos certificados federativos serán:

Licenzas totais.....	1 punto/licenza
Licenzas formativas (categorías base, ata os 16 anos).....	1 punto/ licenza
Licenzas femininas.....	1 punto/licenza
Licenzas de deporte adaptado.....	10 puntos/licenza
Licenzas de técnicas/os ou adestradoras/es:	
▪ Nivel 3.....	5 puntos/licenza
▪ Nivel 2.....	3 puntos/licenza
▪ Nivel 1.....	1 punto/licenza

Décimo terceira. Instrución do procedemento

A instrución do procedemento de concesión de subvencións correspóndelle ao xefe do Servizo de Deportes.



A instrución do procedemento de concesión comprenderá as seguintes fases:

- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- Informe-proposta do xefe de servizo no que figure a valoración das solicitudes, de acordo cos criterios de concesión, explicando o sistema de valoración seguido, relacionando as solicitudes por orde e sinalando a subvención que lles corresponde a cada unha delas. Así mesmo, indicaranse as solicitudes desestimadas, e explicaranse as razóns da súa desestimación.
- Informe de fiscalización de Intervención de todos os expedientes e do informe-proposta.
- Estudo do informe-proposta por parte da comisión de valoración, que estará composta por:
 - Presidente: o deputado delegado da área de Deportes
 - Vogais: un membro do persoal técnico do Servizo de Deportes e un do persoal técnico do Servizo de Intervención
 - Secretaria ou secretario: unha funcionaria ou un funcionario do Servizo de Deportes, que actuará sen voto
- Proposta de resolución. O órgano instrutor, á vista do expediente e do informe da comisión, formulará unha proposta de resolución, que deberá expresar a relación das entidades solicitantes para as que se propón a concesión de subvencións e a súa contía. Tamén recollerá as solicitudes excluídas e os seus motivos.

Décimo cuarta. Resolución do procedemento

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución do procedemento será obxecto de publicación no BOPPO e terá os efectos dunha notificación por tratarse dun procedemento de concorrencia competitiva (artigo 45 da LPACAP). Así mesmo, serán igualmente obxecto de publicidade a través da páxina web da Deputación de Pontevedra.



O prazo máximo para resolver e notificar a resolución do procedemento non poderá exceder os seis (6) meses. O prazo computarase a partir do día seguinte a aquel no que finalice o prazo de presentación das solicitudes. O vencemento do prazo máximo sen notificarse a resolución lexitima as persoas interesadas para entender desestimada por silencio administrativo a solicitude de concesión da subvención.

Décimo quinta. Procedemento de xustificación e pago

As entidades beneficiarias das subvencións deberán xustificar o cumprimento da finalidade para a que se concedeu a subvención.

O prazo de presentación das xustificacións será o seguinte:

- Se a modalidade deportiva se corresponde coa tempada 2021-2022, xustificarase antes do 31 de decembro de 2022.
- Se a modalidade deportiva se corresponde coa tempada 2022 (ano natural), xustificarase antes do 28 de febreiro de 2023.

As entidades beneficiarias deberán presentar a xustificación obrigatoriamente por medios electrónicos a través do modelo "instancia xenérica", dispoñible en <https://sede.depo.gal>.

Para a xustificación as entidades beneficiarias deberán presentar a seguinte documentación:

- **Conta xustificativa** na que se relacionarán os conceptos de gastos por un importe igual ou superior ao orzamento presentado inicialmente coa solicitude. Anexos II (conta xustificativa) e III (continuación).
 - No caso de que se xustifiquen gastos inferiores ao 100 % do orzamento presentado coa solicitude, aboarase a parte proporcional da subvención.
 - Na conta xustificativa especificarase as facturas presentadas para xustificar a subvención concedida e declararase que esas facturas non se utilizaron para xustificar outras subvencións.
 - Na conta xustificativa incluírase declaración responsable de que non se perciben outras axudas ou ingresos para o financiamento da mesma actividade, ou, no seu defecto, incluírase detalle dos mesmos.
- **Facturas ou documentos análogos** con valor probatorio no ámbito mercantil e administrativo polo importe da subvención concedida; indicaranse en cada factura o número de unidades, os prezos unitarios e o prezo total de cada unidade.



- **Memoria** (anexo IV) na que se xustificuen as medidas de publicidade e difusión da subvención, por medio de fotografías onde se vexa de forma clara e inequívoca cada unha das actuacións requiridas. O feito de que as entidades non xustificuen correctamente as medidas de publicidade e difusión constituirá unha infracción e poderá ser sancionable por parte do servizo instrutor, e reducirase a correspondente subvención. Os tipos de infraccións poderán ser leves, graves ou moi graves:

Infracción leve	Entre o 1 % e o 10 % da subvención concedida
Infracción grave	Entre o 11 % e o 20 % da subvención concedida
Infracción moi grave	Entre o 21 % e o 50 % da subvención concedida

Outras normas que se deben ter en conta na xustificación:

- Aqueles clubs que xunto coa solicitude presentasen unha declaración xurada cos criterios de valoración específicos e previstos nas bases deberán achegar o certificado federativo (anexo I) coa xustificación. En caso de presentar un número de licenzas menor, reducirase o importe da subvención proporcionalmente.
- A desviación máxima no custo dos diferentes conceptos da actividade subvencionada con respecto ao orzamento inicial pormenorizado non poderá superar o 30 %. Todo gasto que supere esta marxe non se considerará subvencionable.
- Os gastos presentados na conta xustificativa deben pagárselles ás súas respectivas provedoras e provedores antes da presentación da xustificación da subvención. No caso de que o club non dispoña de fondos nese momento, terá un prazo máximo dun (1) mes a partir da percepción da subvención para efectuar eses pagos. Se posteriormente, mediante control financeiro, se comprobase que algún dos gastos non foi pagado ou se pagou fóra de prazo, este deixará de ser subvencionable.
- As entidades beneficiarias das subvencións provinciais deben empregar, con carácter xeral, formas de pago a terceiras persoas que poidan acreditarse mediante un documento expedido por unha entidade financeira no que queden identificados a ou o beneficiario, o importe e a data de pago (tarxetas bancarias de crédito ou débito, talóns nominativos, transferencias bancarias etc.), e só excepcionalmente poderá empregarse o pago en metálico cando non sexa posible outra forma alternativa. O incumprimento desta



disposición para algún gasto que supere o importe de novecentos (900,00) euros implicará que este se considere non subvencionable.

- No caso de clubs que non teñan contabilidade, os gastos que non se paguen mediante unha entidade financeira non se considerarán subvencionables.

O pago das subvencións farase unha vez aprobada a xustificación, mediante transferencia bancaria á conta sinalada pola entidade.

Para cobrar a subvención os clubs deberán estar ao corrente das súas obrigas tributarias coa Axencia Estatal Tributaria, coa Facenda galega, coa Seguridade Social e coa Deputación de Pontevedra.

Décimo sexta. Medidas de publicidade e difusión

As entidades beneficiarias destas axudas deberán levar a cabo as seguintes actuacións en materia de difusión ou publicidade:

- Equipamento oficial de competición do equipo polo que accede á subvención (1.º e 2.º equipamento)

Subvencións a clubs que participan na Preferente Galicia grupo 2.^a

- Será obrigatorio incorporar a imaxe corporativa da Deputación de Pontevedra nas camisetas oficiais, nun lugar visible e preferiblemente na parte dianteira; esta deberá ter unha medida mínima de 25 x 8 cm.

Subvencións de ámbito inferior ao estatal por importe igual ou superior a 1.500 €

- Será obrigatorio incorporar a imaxe da Deputación de Pontevedra nas camisetas ou pantalóns oficiais, nun lugar visible e cunha medida mínima de 10 x 5 cm

- Equipamento oficial de competición do resto de equipos pertencentes ao club

Subvencións a clubs que participan na Preferente Galicia grupo 2.^a

- Será obrigatorio incorporar a imaxe da Deputación de Pontevedra no resto de categorías ou equipos do club, nun lugar visible e de forma proporcional ao resto de administracións; esta deberá ter unha medida mínima de 10 x 5 cm.



Subvencións de ámbito inferior ao estatal por importe igual ou superior a 1.500 €

- Será obrigatorio incorporar a imaxe da Deputación de Pontevedra; se estivese presente calquera outra administración, esta ira de forma proporcional ao resto de administracións.

- Equipamentos de adestramento

Subvencións a clubs que participan na Preferente Galicia grupo 2ª

- Será obrigatorio incorporar a imaxe da Deputación de Pontevedra no resto de categorías ou equipos do club, nun lugar visible e de forma proporcional ao resto de administracións; esta deberá ter unha medida mínima de 10 x 5 cm.

Subvencións de ámbito inferior ao estatal por importe igual ou superior a 1.500 €

- Será obrigatorio incorporar a imaxe da Deputación de Pontevedra, se estivese presente calquera outra administración, esta ira de forma proporcional ao resto de administracións.

- Equipamentos de viaxe

Subvencións a clubs que participan na Preferente Galicia grupo 2.ª

- Será obrigatorio incorporar a imaxe da Deputación de Pontevedra no resto de categorías ou equipos do club, nun lugar visible e de forma proporcional ao resto de administracións; esta deberá ter unha medida mínima de 10 x 5 cm.

Subvencións de ámbito inferior ao estatal por importe igual ou superior a 1.500 €

- Será obrigatorio incorporar a imaxe da Deputación de Pontevedra, se estivese presente calquera outra administración esta ira de forma proporcional ao resto de administracións.

- Lonas publicitarias na instalación de competición

Subvencións a clubs que participan na Preferente Galicia grupo 2ª

- Será obrigatorio incorporar 4 pancartas coa imaxe corporativa da Deputación, cun tamaño mínimo de 3 x 1 m (unha en cada fondo e unha en cada lateral), estas deberán estar nun lugar visible.

Subvencións de ámbito inferior ao estatal (en tódolos casos)

- Será obrigatorio incorporar unha pancarta coa imaxe corporativa da Deputación, nun lugar visible e cun tamaño mínimo de 3 x 1 m.



Outras medidas, se procede:

- Vehículos oficiais do club: todas as entidades que dispoñan dun vehículo oficial do club deberán incorporar a imaxe da Deputación de Pontevedra nun lugar visible e de forma proporcional ao resto de administracións.
- Carteis oficiais: todas as entidades deberán incorporar a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade.
- Paneis traseiros para eventos ou actos do club, coma roldas de prensa, presentacións, comunicacións ou premios: todas as entidades deberán incluír a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade.
- Espazo dixital do club (páxina web e redes sociais): todas as entidades deberán incorporar a imaxe corporativa da Deputación nas cabeceiras ou nos apartados de colaboradores ou patrocinadores das entidades. Nas redes sociais será obrigatorio aparecer nas cabeceiras ou nas fotos de perfil. As entidades deberán nomear a Deputación sempre que se etiquete ao resto de entidades ou administracións colaboradoras.
- Outros soportes publicitarios: no caso de que as entidades realicen outras accións ou medidas publicitarias coma retransmisións en directo, colocación de pantallas LED na pista ou calquera outra, deberán incorporar a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade

Todos os gastos xerados pola produción ou pola actualización dos elementos publicitarios mencionados correrán a cargo da entidade subvencionada, que se comprometerá a actualizar as medidas de difusión canto antes, en todo caso antes de xustificar a axuda concedida.

Os logotipos oficiais que se deben inserir están dispoñibles en www.depo.gal (área de descargas/imaxe institucional).

En caso de non poder levar a cabo a difusión e publicidade nos termos establecidos, deberase xustificar e propoñer unha alternativa, que requirirá a aprobación da Deputación de Pontevedra.



Estas medidas de difusión deberán ter en conta para futuras actuacións por parte das entidades solicitantes á hora de deseñar novos equipamentos ou calquera outra medida.

Décimo sétima. Obrigacións das entidades beneficiarias

Ademais das obrigas previstas no artigo 14 da Lei 38/2003, de 17 de novembro, xeral de subvencións (LGS), en particular as entidades beneficiarias terán que:

- Cumprir coas medidas de publicidade e difusión nos termos regulamentariamente establecidos nestas bases.
- Cumprir nos demais supostos previstos nesta normativa reguladora das subvencións.

Décimo oitava. Incumprimento

Unha vez vencido o prazo de xustificación sinalado nestas bases ou, no seu caso, o establecido na prórroga sen que a entidade beneficiaria presente a documentación xustificativa, o Servizo de Deportes requiriralle que o faga no prazo improrrogable de quince (15) días.

O feito de non presentar a documentación neste prazo supoñerá o inicio de expediente de perda ó dereito á cobro da subvención e as demais responsabilidades previstas na LXS.

Décimo novena. Reintegro ou perda do dereito ao cobro da subvención

As subvencións concedidas deberán reintegrarse cando as causas sexan posteriores ao pago destas .

Producirase a perda do dereito ao cobro da subvención, total ou parcial, nos supostos de falta de xustificación ou da concorrencia dalgunha das causas prevista na lexislación das subvencións e, en concreto, nos seguintes supostos:

- Incumprimento das obrigas establecidas con motivo da concesión da subvención.
- Incumprimento das obrigas da xustificación.
- Incumprimento das obrigas que debe adoptar nas medidas de difusión do financiamento público recibido.
- Aqueles establecidos na normativa de subvencións.



Vixésima. Órgano de aprobación

De acordo co establecido na base 16.2 das Bases de execución do Orzamento para o ano 2022 e cumprindo o establecido no artigo 17 da LXS, o órgano competente para a aprobación destas bases é a Xunta de Goberno.

Vixésimo primeira. Dereito supletorio

Para o non disposto nestas bases contemplárase o establecido no artigo 4 da Ordenanza xeral de subvencións da Deputación de Pontevedra.

Vixésimo segunda. Recursos

Contra estas bases e as resolucións administrativas que se adopten na súa execución poderá interpoñerse, no prazo dun (1) mes, un recurso de reposición ante o órgano que as ditara, que se entenderá como desestimado se transcorrese este período sen recibir contestación. Neste caso poderá interpoñerse no prazo de dous (2) meses un recurso contencioso-administrativo perante o xulgado do Contencioso-Administrativo, como se prevé no artigo 8 da Lei 29/1998, de 13 de xullo, da xurisdición contencioso-administrativa. Contra esta resolución tamén se poderá interpoñer directamente un recurso contencioso-administrativo no prazo indicado.

En todos os casos os prazos contaránse a partir do día seguinte ao da recepción da correspondente notificación ou da data na que o recurso de reposición se entenda como desestimado.

Vixésimo terceira. Publicidade da convocatoria

Estas bases reguladoras publicaranse no BOPPO e en <https://sede.depo.gal> .

Así mesmo, de conformidade co previsto nos artigos 17.3 b) e 20.8 a) da LXS, o texto da convocatoria remitiráselle á Base de Datos Nacional de Subvencións para a súa publicación, que será a que lle dea traslado do seu extracto ao BOPPO.



Vixésimo cuarta. Protección de datos

Os datos persoais recollidos neste procedemento serán obxecto de tratamento pola Deputación de Pontevedra en calidade de órgano responsable, coa finalidade de xestionar este procedemento, verificar os datos e os documentos que as persoas interesadas declaren nas súas solicitudes para comprobar a exactitude destes e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa en interese público ou no exercicio de poderes públicos, segundo as normas de rango legal recollidas no apartado “normativa aplicable”, dispoñible na ficha do procedemento en <https://sede.depo.gal>.

Os datos persoais obtidos nestes procedementos serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercer outros dereitos ou revogar o seu consentimento segundo o previsto en <https://depo.gal/proteccion-de-datos/exercicio-de-dereitos>.

